

聖



高郵州

在府北百二十里

轄二縣

環海記謂是秦亭本志云古邗溝地秦時始築臺亭其上漢置高郵縣本此又改平阿晉曰三阿其名可攷也劉宋元嘉以產嘉禾立神農郡于此宋曰高郵軍元陞爲府 國朝曰高郵州吳元年張士誠起白駒場據之卽此地○州號高沙有高沙館輿地紀勝云卽國信監司之行衙也在州西南文天祥發高沙館詩曉發高沙卧一航輕烟漠漠水茫茫舟人指點荒村外南北今年幾戰場○又號孟城以地形如覆孟也秦少游詩吾鄉如覆孟

地據揚楚脊環倚萬頃湖粘天四無壁少游州人
今州南門外有孟城驛○宋揚萬里過高郵詩解
纜維揚破夕陽過舟覆盎已晨光夾河漁屋都編
荻背日船篷尚滿霜城外城中四通水堤南堤北
萬垂楊一州斗大君休笑國士秦都此故鄉謂少
游也元薩天錫孟城曉望詩城上高樓城下湖城
頭畫角曉鳴鳴望中燈火明還滅天際星河淡欲
無隔水人家種楊柳帶霜鳧起菰蒲短衣瘦馬
從茲去擬向烟波覓釣徒○宋朝會要云開寶四
年建高郵軍尋廢爲縣隸揚州元祐元年詔復軍

額賜帑金以葺軍治兼脩衆樂園經始于毛漸落
成于楊蟠蟠錢塘人少年登第有文名于園內起
堂臺亭閣十二所○蔣之奇東園長篇蓋合十二
景而名也其詩云三十六湖水所瀦其尤大者爲
五湖中間可以置郵戍隱然高阜如覆盂爾來水
利復興復汙萊墾闢成膏腴豐年上瑞世罕有沐
浴聖澤疲氓蘇朱輻誰爲千騎長錢塘夫子分左
符下車政成在談笑教條未久民已孚大開名園
治亭榭時燕朱履爲歡娛高臺雄跨一千尺熙熙
樂國游華胥堂軒峻壘青壁滑老蚌放開明月珠

蒼龍脫角瑩且澤解爪自與風雷俱郊家女子已
仙去尚有故井存通衢凌波羅襪塵欲起冉冉玉
水翻紅蕖搖耀蘸影弄姿媚粉黛醉倒無人扶牡
丹芍藥開四達品第未必揚州殊武陵迷春無處
問杳杳仙路深盤紆流杯插花勸客飲霏霜濺雪
來坐隅序賢析爵發鳴鏑傳花疊語爭喧呼主人
能詩有仙格錦囊麗藻紛披敷擬驅烟駕逐烟客
曠浪塵外天爲徒夢得池塘生春草一句我知今
古無西歸定躡瀛嶠頂氣象早已居蓬壺甘棠留
愛在他日好事傳作淮南圖○輿地紀勝云豐瑞

堂以芍藥得名淳熙三年夏四月郡圃芍藥一枝
五色時郡守王調名其宴寢之堂爲豐瑞仍作五
花圖于上卽古時燕堂也楊蟠詩云吏隱孟城九
十旬豐年日日是佳辰五千芍藥齊教放何處揚
州更覓春又題玉水堂詩云小池鷗鷺不成群池
畔蕭然一使君時霎醉眠春雨足覺來衣上有閒
雲○衆樂園亦名東園州人陳造東園燕集詩云
春工幾時來天涯人間指顧成衆華未歎丹杏無
餘葩能事已到桃李花東園地勝賓盡佳塵中霏
屑杯中霞欲催紫衣巾小車我亦款段隨揮撾况

復高柳倦翻鴉○東園有四達齋趙晦之建蘇子
瞻銘云有藏于中必謀于外惟慢與謹皆盜之誨
孰知此間空洞無物戶牖開闢曠焉四達擊去盜
易使無盜難我無可攘以守則全趙侯無心得法
赤溪四出其齊以達民迷○德晝堂在州圃宋政
和三年毛澤民漸建以蔡魯公襄所書四榜十二
字刻之石置于堂上○淮春樓州西北城樓也宋
守趙不慙建陳造詩云步帳高牙建下方華筵雲
影入風裳西山爽氣珠簾外北海芳樽錦瑟傍賓
主前聞無勝事簪釧明日賸餘香一天和氣誰拘

簡付與邦人作醉鄉○激犒庫在北門外宋慶元
中重建酒務之區商旅買集之所也本庫上梁文
石存畧云郵郡要衝城陰都會積年蠱敝漫餘酷
肆虛名千柱鼎新倏駭市區壯觀是爲創見高掩
前聞豈徒千里之醉鄉殆爲一州而建德○多寶
樓在北門外太平街西商賈所聚珍貝必售于此
有橋曰寶樓橋西元人小菩薩臺今社稷壇是
橋東有臺曰東臺元人叫佛臺也橋下爲張宣慰
故宅張仕元爲雲南宣慰使國初率所部來歸後
來朝請擇地歸老于此○楊萬里題九里亭詩云

水渚纔容足漁家便架椽屋根些子地簷外不勝
天岸岸皆垂柳門門一釣船五湖好風月乞與不
論錢右亭在北門外○饒香港有二一在州東門
外一在州西北十里通我鷺兒白湖南接城子河北
抵運鹽河西入廟橋皆以便東岳行宮取道燒香
而設按宋自南渡後畫淮爲守燒香者無由達秦
安州率之高郵行宮廟所應公武東州岳廟記曰
蓋自浙江以西淮堧以東來者肩摩袂接旁午道
塗而此邦岳廟之盛甲于天下焉□紀勝云太平
興國中高郵起東岳廟屋幾千楹爲東淮祠宇之

寇在軍東三里五十步廟後卽文遊臺蘇子瞻昔
過是邦與孫覺王鞏秦觀會集于臺上命曰文遊
龍眠李伯時作文遊臺圖刻之石○圖經云玉女
井在治西南望仙橋東東齊邾道光與其女居井
傍煉丹同日仙去橋畔泉亭卽井所在道衢中市
橋也○乾明寺在中市橋西晉江昭慶禪師住寺
時州人士多從之遊尤與秦少游緣契師沒少游
爲其塔銘陳造乾明寺詩云竹風清如水浣我塵
埃顏老禪貧無錐小破蔬筍慳短轅下鷓夷共此
半日間住葦訊鶯燕把杯屬江山老夫病止飲老

語認莫刪揆予郊島寒着君季孟間江柳未遽折
園花且同攀後夜短亭夢謾寄東風還○塚廟記
云斷塔在光孝寺原九級爲龍抓其半爪迹猶存
寺居州城西南隅唐舉直禪師者懿宗子僖宗弟
遊方至州得太平倉地請于朝詔以爲鎮國禪院
其堊塔在院西隅元豐盜發之其全骨若聯鈎鏤
焉宋時重脩改今名陳造募緣疏畧云有唐名刹
合盛于熙朝大雄秘宮劣存其故址劫火嘆遭罹
之酷精藍墮寂寞之濱住持更幾人叔出季處之
靡定經營不一日銖積寸累之有涯未免小舉而

大遺幾成置本而狗未倘黃面老之像設未獲所
棲則舉直師之愿心得無遺憾云云○醴泉寺亦
在治西南或云卽光孝因井湧甘泉改名秦少游
開堂疏云毫端寶刹會何新故之常天下大禪安
有去來之累唯古佛廟實今醴泉自百年香火之
餘治一國風烟之際塔闕連環之玉骨殿藏交錦
之貝文然而飛鳥銜花空存勝境真珠撒帳未遇
明師逮軍旅之薦興獲法筵之初啟芳公長老少
通教相晚悟宗乘密行則鄉黨之所皈依妙法則
天龍之所回向遊方旣久蔚海滋深願辭擁腫之

居亟返歸來之駕爲談不二以度爲邊○米元章
畫史云高郵壁水郡人曹仁熙筆中一筆長丈餘
水勢從北分去世所實惜按寰宇記卽水壁院也
在軍治城中張表臣詩曹生畫水信有神毫端風
雨生波沄波濤不合生殿屋鮫鱓何須欲噬人湯
湯此水勢方割陽侯鬱怒馮夷搏龜擲鯨吐海嶽
驚霧塞雲昏光景薄開元將軍愛驪驪權竒滅沒
隘九州時危此物豈易得寫此尚可消人憂未有
仍孫善畫水通客見之心欲死雷奔電擊走中原
魚怖龍愁寧忍視先生道眼高崑崙聊將妙語破

迷津中流險絕待舟楫四海浩蕩須經綸我哀其
作淮海客身脫垂涎頭雪白驚心未定畏崩湍欲
覓平波泛家宅此身端的老江湖雨笠烟蓑是所
圖他年但飽揚州米此日寧論甃社珠晁以道覽
之曰此詩波瀾亦可駭矣○紀勝云龍角院在軍
治院僧藏龍角一具其色瑩然與青玉無異風雨
晦冥雲氣恒滿○上真殿在南甕城內宋英烈夫
人祠址也端平初榮全據高郵叛制置使遣人招
撫不納與其黨開宴高會官妓毛惜惜辭不赴宴
強之來指坐上罵曰初謂太尉降爲太尉賀更生

矣今乃閉門不納使者真叛賊也妾雖風塵不能
 為叛人行酒全怒立殺之後闢帥以聞為之立廟
 潘紫巖詩云淮海艷姬毛惜惜娥眉中出萬人英
 恨無七首學秦女曩使裹頭真杲卿玉骨花顏城
 下土水魂雪魄史中名古今無限腰金者羅綺叢
 中過此生○三皇廟今治西行府其舊址也 國
 初令天下州縣俱建廟洪武二十九年始革除續
 本草云高郵軍三皇廟槐角子良○圖經郵為水
 鄉芙蓉特盛多至數十里相連不斷而魚蝦之類
 甲于東南宋鄭獬有食魚憶新開湖詩柳條穿水

一雙鯉鱗插金錢腰尾長何日酒船飛白浪湖邊

先問把臂郎又曾繫畫船湖比樹船家新筵白醪

醅紫荷葢下黃金鯉只就醫頭買得來○新開湖

在治西北三里其水東南俱通運河久雨則漲旱

亦不涸大抵天長縣以東諸水盡匯此湖而達之

于淮也長濶各百五十餘里○山堂攷索云淮東

川澤之國凡小洲大渚水勢環遶人所不到之地

皆水寨也自老鸛新開諸湖而言凡四十餘處而

相通之寨凡九寨一官一將主之南宋所為守淮

者皆恃新開等湖以為之險耳○古樊良湖在州

治北初學記云山陽有樊良湖隋大業中嘗移高郵縣治于繁梁溪水微初復舊治因名其處爲故縣村○樊良鎮去州城十八里漢樊噲常居之樊良溪邊有樊良廟二像設俗傳樊噲張良二神未詳○本鎮有玩珠亭沈存中筆談云嘉祐中甓社湖有一珠甚大十餘年來居人行者恒見之予友人書齋在湖上一夜見之甚真初微開其房光自吻中出如橫一金線俄頃忽張殼其大如半席珠大如拳白光如銀爛不可正視十餘里間林木皆有影如初日所照遠處但見天赤如野火倏然而去其行如氣浮于波中杳杳如日古有明月之珠此徑類日亦一奇也崔伯易于繁梁鎮上常見之作珠湖賦行舟至此往往維數宿以待因起玩珠亭岸邊其後多于新開湖見之○甓社湖在城西三十里東南長七十里南北濶五十里湖中有珠光或竊謀採之舟將近風輒引去又云見珠光必有大休咎孫莘老登第年見之建炎中光竟夜尋羅兵革○湖西有釣魚臺舊傳熙寧中有道人于湖濱築臺朝夕垂釣自言有二大魚自西來潛入此水當爲釣之以免生民害○繫年錄云承楚

之閒有樊良等三湖綿亘三百餘里梁山灤水賊
張榮徃來其中有舟數百隻常劫金人東京守杜
充招安之假忠州刺史軍中號爲張敵萬三湖蓋
新開樊良甃社也□新開湖中突起一洲可百畝
餘水雖盛漲終不能沒洲去城十里許上有耿七
公廟相傳耿東平梁山泊人鄆女茅氏所生生而
正直沒卽棲神于此人恒見湖中危竿懸燈千百
于波濤洶湧之中○紀勝云州西六十里有五湖
黃庭堅詩九陌黃塵烏帽底五湖春水白鷗前扁
舟不爲鱸魚去收取聲名四十年又十里有珠湖

以形似名秦觀詩云高郵西北多巨湖累累相連
如貫珠○平阿湖在州西八十里元薩天錫詩秋
風吹白波秋雨鳴敗荷平湖三十里過客感秋多
又雨濕鼓聲重風勻湖面平官船南北去帆影掛
新晴按志鄆以平阿名者有湖有溪有村而平阿
之北名北阿鎮平阿之南爲下阿谿□晉史太元
四年夏秦陷盱眙進圍三阿朝廷大震臨江列戍
謝玄自廣陵救三阿唐書嗣聖元年揚州將軍李
孝逸敗李敬業于下阿初敬業取揚州聞孝逸至
回軍拒之屯下阿溪阻水爲守魏元忠曰風順荻

乾火攻之利也從之其將斬敬業首來降駱賓王
遁去○州乘云治西南武安湖濱夜有光起高高可
燭天 國初時湖邊居民相率掘之得一石碣上
鐫河院寺三字自後光絕因建古河院寺按武安
湖在州西南三十里通露舫河○南兗州記云高
郵軍有土山山頂有石井石臼井大可五尺深倍
之一名石塘水清冽大旱不竭山下時見朱衣人
高冠巍巍徘徊井側或云是古列仙之宅○輿地
廣記云神居山在治西南六十里謝安曾煉丹于
此石山載土者也一名土山以形類土字云高二

十五丈周十五里南齊有亘公者結庵土山上煉
丹種藥歲久成仙今何首烏等草五十餘種時時
發生卽夜交藤也□紀勝云神居山有排牙石齒
齒如排牙人欲數之自始至終其數必增自終而
始其增愈甚竟無能知其數之的者陳造九日登
土山詩行行千刻曷風沙驟喜深堂放馬撾旋報
陰雲漏紅日共追佳節把黃花多煩沽酒留元亮
莫謾移文調孟嘉未竟笑談人已醉擔頭片月欲
翻鴉○山有悟空寺陳造留插居悟空禪師退院
偈曰瞿曇住西域說法度群生群生所依怙目以

不動尊惟其不動故群動皆攝受是時波旬種百
千萬眷屬排根摧毀辱蜂發雨矢集瞿曇如涸彌
蟬蟻如子何亦如太虛空雲翳自變滅砥柱中驚
波古今無少損不動而坐勝妙力固如是實師住
神居四衆所歸向以師清脩故雖爲衆歸向不作
患失想翩然挈瓶錫去若釋嶠雲亦如辭箭弦勢
若不可挽自師掃積弊群魔尚遺種瞿曇昔去世
政以波旬故師行不回首彼魔所願欲雖無末法
病或昧不動意請答四衆心請爲神居地○塚廟
記云州東北九十里臨澤鎮有禹廟及秦王子嬰

廟○沛城村在城西北昌平鄉有漢高帝及更始
廟○三塚鎮在城東四十里有武寧王廟南史梁
簡文帝第十五子諱大威字仁容美丰儀眉目如
畫太寶元年封爲丹陽尹遇害于三塚故鄉人祀
之○露筋烈女廟在州南三十里耆老傳云烈女
與其嫂過此天色已昏嫂顧湖邊田舍挽共投宿
女執詞不從乃獨露坐草中時秋蚊方殷質弱不
勝撲搔至旦血竭筋見而死居人憐之爲立祠碑
目云露筋碑米南宮文併書其畧云澤國之女嗜
膚露筋不就有韓氏之子氏不顯于一時名可揭

于萬世紹聖元年十月中岳外史米芾東歸過其
下刻石贊曰王化煥猗盛江漢叔運煽猗人倫亂
一德彥猗昭世典情莫轉今天質善楚澤緬兮雲
木偃煒斯節今日星建本朝陸弼詩云古廟無名
氏蕭條湖水濱露舫傳往事雪涕自行人山霧羅
巾薄庭花玉貌新南宮詞不愧獨與表貞珉○繫
年錄云建炎三年薛慶據高郵張浚知樞密院以
百騎渡江親造賊壘諭降之詔卽以慶知本軍明
年七月虜圍揚州慶力戰無援死之又云紹興四
年劉豫子姪引兀朮三路入寇步兵自楚取承州

承宣使韓世忠自鎮江濟師遣都統制解元來援
至北門外遇敵乃列水軍夾河而陣一日十三戰
大殲虜于北門今高郵北門名制勝本此○建炎
中金人攻楚州詔通泰鎮撫使岳飛援之仍命劉
光世繼進飛屯軍三垛鎮爲楚聲援鎮去承州東
四十里三戰三捷殺虜高太保俘酋長七十餘人
以孤師力寡光世兵不敢前楚州雖陷而承人德
之○汪之信盱眙人爲沿邊招討使駐高郵時聞
兵陷建康率所部數千人欲控引江淮以爲後圖
及聞賈似道師大潰乃置酒召賓僚與訣手自爲

書起居三宮夜分起步庭中慷慨悲歌撫膺數回
泣失聲三日扼吭而卒○列傳云高郵崔希甫有
文武才江南平潘美薦之召拜宮僚賜金紫尋拜
監察御史凡更置諸道事宜沿邊將帥多命乘傳
處分特賜金帶仍命懸魚時號重金御史其孫公
度字伯易有文名常作咸山珠湖諸賦仕直龍圖
閣○孫莘老名覺黃魯直之婦翁也第進士嘉祐
中編校昭文書籍遷右諫議龍圖閣學士同時孫
正臣閩之邵武人僑居高郵亦官龍圖閣卒塋焦
里村至今高郵有兩孫龍圖云○秦少游名觀一

字太虛初見蘇軾于徐作黃樓賦甚奇之及登第
為秘書正字編脩官坐元祐黨及增損實錄謫杭
處二州又坐謁告寫佛書削秩徙郴州編管橫州
尋徙雷州詔毀其文集徽宗立放還至藤州遊華
光寺為客道夢中長短吟有醉卧藤陰下了不知
南北之句已索水欲飲水至笑視之而卒年五十
三著淮海集三十卷閒居集十卷詩餘一卷行世
○陳造字唐卿范成大見其詩文使遇歐蘇盛名
不在少游下有詩文四十卷○趙默應該博科呂
東萊擢其對策第一有啟云每思南渡以前恍如

天外不意北方之學復到眼邊○桑景舒登皇祐
五年進士精樂律世傳奏虞美人曲于虞美人草
傍則枝葉皆動景舒審此曲皆吳音也乃取琴用
吳音別製一曲對草歌之枝葉亦動于是名其曲
爲虞美人操○宋末稽聳迎文天祥于家設醴甚
謹復津遣之使其子與客伴送至泰州于是丞相
得由通航海達閩行在及工部侍郎柳岳奉降表
于元道經稽庄聳憤而殺之文信國稽庄卽事詩
云乃心王室故日夜念南征陷險寧追悔懷忠莫
見明鴈聲連水遠山色與天平枉作窮途哭男兒

付死生右庄去州東南十五里城子河邊已上皆
高郵人

興化縣在州東百
二十里

僞吳武義年中置今縣言將振興其教化也其前
後爲昭遠場及昭陽鎮蓋本楚將昭陽采邑云○
紀勝云南溪在治南半里范仲淹宰邑日嘗遊溪
上作南溪馴鷗詩萬物有常性性無不貴生鳳翔
去駿奔一一遠害情舵彼沙上鷗皎皎霜雪明夜
宿滄浪靜日浴滄浪清何以狎溪人溪人淡無營
循循自飲啄往往相逢迎徘徊兩無猜何慕復何

驚○廣記云濯纓亭在舊稅務前范文正公建有
詩云素心愛雲水此日東南行笑解塵纓處滄浪
無限清公又建滄浪亭于上陳垓為之記有滄浪
橋即今減水閘之太平橋○舊海子池北有玄武
臺下瞰海子元詹士龍讀書處城北玄武橋其址
處興化令詹雲卿為御史去官隱于此○縣西烏
巾蕩縣南蓮塘浦各去半里許是六十四蕩之數
按志有蓮花六十四蕩自蘆州河起南接得勝湖
西接海陵溪中間十里紅蓮邦人之奇賞○輿地
記云昭陽山有三府君廟史記昭陽為楚懷王令

尹出入將相註云昭姓陽名山去治西四里及三
百步高三丈周二十丈山下有令尹昭陽墓○城
東隅有三閭大夫廟志云戰國時此地屬楚故昭
陽三閭皆得祀之縣又祀姜太公有廟在東北四
十里舊名釣魚廟○一統志云縮頭湖在縣東十
里宋張榮賈虎率山東義軍由梁山泊與金虜轉
戰至于承楚時虜將撻辣在秦州義軍屢劫之榮
等復統萬人掩擊于縮頭湖出其不意虜隻舸無
還湖水為之變色獲駙馬蘆巴等萬餘人生擒撻
辣之弟破辣叔等因改湖名得勝其南為白沙湖

○南兗州記云湖岸有白沙茫茫處卽白沙湖也亦去縣十里○仲家河在縣西北十五里仲二舍人之居按仲氏宋初死于亂軍中太祖以銀製頭塋之爲疑冢十餘處在長安鄉又云仲氏兩舍人世掌絲綸縣北界有鳳凰河因之得名○平望湖在縣北二十里湖中有岡阜古冢土人偶發之得一劍屈之則首尾相就手放復直如故出則錚錚有聲亦可斬鐵金開禧中統兵官高大捷得之曰此古之繞指柔也又三里爲吳公湖以昔吳尚隱居湖側故名○平人湖在縣東北一百里故老

傳隋末有千餘人避難于此得見太平因號千人湖按志有八湖在邑界此其大凡也○南兗州記云紅山在縣東南七十里北去江三百步與泰興相望○縣南陵亭鎮之法華院唐咸通建院有銅鐘一口甚清越窾識是乾寧中鑄○法華寺西有鐵棺塚非石非鐵長九尺高二尺前濶後狹薛受據州時遣人掘動聞其內有物相觸聲乃以鐵鎚擊之數百畧無少損又鼓鞞鎔之其堅尤甚乃止○碑目云興化舊縣治寶嚴院中塔基甃石俱有鐫刻爲唐大順九年物寺尚存○元先生華山隱

者師劉海蟾嘗過興化縣館于賈氏能以糞壤爲黃金一日舉葦席置之溪流趺坐其上汎汎而去不知所之○縣界丁溪草堰二場之間有張五墳蓋士誠之父也本白駒場竈籍俗以正月望前聚禱其廟所因而格鬪爲樂卽死傷無告論者

寶應縣

在州北百二十里

本漢平安縣一名安平東漢名安宜梁析置陽平東莞二郡隋罷郡仍置安宜省石鼈縣入焉唐武德中立倉州以領之縣屬楚州卽今淮安府也上元三年獲定國寶詔改今名國朝改今屬○唐鄭

輅得寶記云開元中有李氏女子嫁賀若氏旣寡爲尼名真如家于鞏縣天寶元年七月七日有五色雲自東方而來雲中有人引手授以一囊令寶之及天寶末真如流寓安宜縣肅宗元年建子月十六日夜真如忽見皂衣二人引從東南去奄至一城樓觀嚴飾見天帝謂曰下界喪亂殺氣腥穢達于諸天莫若以神寶厭之乃授以第二寶復謂真如曰前所授汝小囊有寶五段人臣可得見之今茲八寶惟王者所宜見汝往告刺史令此寶達于天子真如具以聞官建巳月上達肅宗方疾促

召代宗謂曰汝自楚王爲太子今上天降寶于楚
是祚汝也代宗再拜受賜卽日以寶應紀年升楚
州爲上州改安宜爲寶應陞望縣焉輅卽楚州刺
史也○太平廣記云尼真如所居之地名得寶河
河壩高敞境物潤茂後爲崔瑄私第瑄六合尉也
兩堂之間恒發寶氣西域胡人每過必瞻禮之○
鄭輅曰後八寶一如意珠二紅靺鞨三琅玕珠四
玉印五皇后探桑鈎二枚六雷公石二枚先五寶
一玄黃天符二玉雞三穀壁四王母玉環二枚○
廣記云唐上元間寶應齊壽橋下出小龜有毛金

綠色以貢○孝仙橋在城北市昔有以昏禮宴客
者一客在座忽然出門至橋下若將赴水狀主人
急持之問故客言見一女子以詩見招倉皇就之
不知其爲水也其詩云長橋直下有蘭舟破月衝
烟任意遊金玉滿堂何所用爭如年少去來休○
志云縣治向稱澤國若汜光白馬射陽諸湖承淮
河下流汪洋萬頃衝雷激電爲最險之區魚蝦鴈
鶩其利甚溥呂本中舍人舟次寶應詩云半升濁
酒試尊羹賤買魚蝦已厭烹淺水依蒲有船過淡
烟籠月更人行○汜光湖在縣西南十五里東西

長三十里南北濶十里白馬湖在縣北十五里東
西長十五里南北濶三里○射陽湖在治東六十
里濶三十丈長三百里中流與鹽城縣分界志云
湖東屬鹽城湖西屬山陽湖東至上射陽屬寶應
○箕山在縣東六十里今無山有丘阜百餘疑卽
所謂射陽阜也舊圖經載寶應有射陽阜其丘千
數東臨射陽湖○塚記云三國陳琳墓在射陽村
中溫庭筠過琳墓詩曾于青史見遺文今日飄零
過古墳詞客有靈應識我霸才無主始憐君石麟
埋沒藏秋草銅雀荒涼鎖暮雲莫恠臨風倍惆悵

欲將書劍學從軍○袁術墓在縣南三百步墓前
有碑鐫漢時衣冠人物甚工○紀勝云安宜溪在
縣西南四十里通灑火湖金釵澗在縣南七十里
白水陂在縣西八十五里海陵溪在縣東九十五
里白水陂鄧艾所設與盱眙破釜塘相連開八水
門立屯漑田萬二十頃宋元嘉末決水以灌索虜
卽此大業未破釜塘壞水北入淮○海陵溪俗呼
琵琶頭西北通射陽湖○城塚記云金井城在縣
東十五里孝義鄉宋熙寧間王將軍築高三丈許
土色正黃城形如牛故名○石鼈城在縣西八十

里按卽隋初石鼈縣也通典云山陽重鎮守險有
平陽石鼈田穀豐饒蓋歷代屯田之所晉荀美鎮
淮陰屯于東陽之石鼈卽此○唐李白贈徐安宜
詩白田見楚老歌咏徐安宜製錦不擇地操刀良
在茲浮人若雲陽耕種滿郊岐川光淨麥壠日色
明桑枝青橙拂戶牖白水流園池遊子滯安邑懷
恩未忍辭李從一送皇甫冉之安宜詩江臯盡口
惟烟水君向白田何日歸楚地兼葭連海迥隋朝
楊柳映隄稀津樓故市生荒草山館空城閉落暉
若問行人去征戰使君雙淚定沾衣按二詩皆以

安宜爲白田必當時別名今不可攷從一卽嘉祐
之字廣陵人

泰州

在府東百二十里

轄一縣

漢臨淮郡之海陵縣也吳王濞積貯于此曰海陵
倉枚乘謂轉粟西嚮不如海陵之倉者此也晉改
海陽縣東晉立海陵郡唐改吳陵縣立吳州五代
楊氏置海陵統制院江南錄云李昇天福二年丁
酉十二月以揚州海陵爲泰州取通泰之義俗傳
泰州城爲尉遲敬德所造其磚尚有古色尤小于
宋朝柳葉磚○方輿勝覽云淮東道院在州治大

廳之東以海陵地僻訟簡而名之也宋左丞陸佃
出守茲州謝表云飛蛟漸少頗無澤國之風過客
甚稀至有道院之號新志州當淮海之中稱爲爽
塏水澤縈繞民居多萃于城西北城中蒲葦相望
焉○紀勝云永寧宮州廨是也僞唐遷楊行密子
孫于海陵號其居爲永寧宮嚴兵守之絕不通人
久之兒女自爲匹偶及周世宗征淮南詔撫楊氏
子孫李景遣人盡殲其族○吳陵志云州宅東有
墳數十號小兒塚李氏初主本徐溫養子及僭號
遷徐氏于海陵中主用宋齊丘計盡殺之無分男
女少長後齊丘有小兒病倉皇醫禱有樂工放紙
鳶入其第題詩鳶上曰化家爲國實良圖總是先
生畫廟謨一個小兒拋不得上皇當日合何如○
九域志云泰州譙樓是楊行密子孫所居舊址周
世宗旣賜荆罕儒鼓角門戟罕儒遂建樓宋淳熙
中韓元吉爲之記○勝覽云清風閣在舊治內自
五代時疊石爲山翼以兩徑爲登陟之階中砌滑
石峻屋臺上則閣也眼界清絕故魯致堯有更無
塵土當軒起只有松蘿繞檻生之味○致堯咸平
中知泰州子易占知如臯孫肇紹聖中復典是郡

因立三至堂刻山亭六味如清風閣其一也○畿
志云舊治內水村環遶多芙蓉因名藕花洲洲後
有亭扁曰浮香宋茂陵御書也傍有古梅樹秦太
虛等倡和有詩紹聖中太守陳垓勒詩于石而新
其亭詩云海陵參軍不枯橋醉憶梅花愁絕倒爲
憐一樹傍寒溪花水多情自相惱○泰山在州治
西城內壘土而成高五丈周百二十餘丈以州名
各之閩人陳垓取杜詩西岳雲峯起之句建起雲
樓其上高四丈俯瞰方洲遠睇金焦爲淮東巨觀
安定胡先生祠在其上樓下爲小西湖植桃李芙

蓉彷彿虎林之勝○羅浮山在州西北五里藪澤
中洪水不能漫遙望如羅浮故名○治西有市河
南有東市河西南有西市河治南有運河北有北
運河西北有西運河阮勝之記云此卽吳王濞所
開通運至海陵倉者灣頭至城下運河是也○市
河西有狀元坊王俊父所居宣和間大魁○市河
西岸有登仙橋橋下名太子港相傳梁大同間王
仙翁上昇昭明太子取道此港上天目山致禮之
○市河西南跨橋名曰八字亦曰中橋與樂真橋
八字相向故名按樂真人名子長州人也在漢時

成道白日飛昇樂真橋是其遺跡○仙源萬壽宮
 在子城東南本晉樂真人故宅祥符中以為天慶
 觀崇寧中徐神翁展脩觀室為五百區今惟存齋
 堂一所有丹井乃皇甫真人煉丹處其水其冽和
 藥有効○新河在州治西光孝寺在新河東寺有
 富彌書堂蓋公嘗侍其父征商于此與胡侍講周
 待制相友善云○城北二里開化院王屋禪師道
 場也唐寶曆中自蜀來卓錫于此有卓錫泉云與
 府城蜀岡水通○城西北隅有太保潭周廣數畝
 南唐保大中刺史郭載所鑿以禦北師太保其簡

校官也○宋貢院在南山寺西紹聖初陸佃為守
 時建內有鳳池朝陽守雌二亭鷗閣鳧菴凡六十
 二所陳垓為守又浚鳳凰池二起池閣前列長堤
 植槐柳其上今皆廢鳳凰池在子城內資福院余
 為放生池紹興辛巳虜騎入寺僧覺如捧金剛自
 塔中出長揖虜問何恃而不恐舉手答曰恃此且
 為敷演其義虜皆羅拜遺白金施之于時室廬皆
 燬此刹獨全○吳陵志云尉廳在東門外其側有
 大雅亭憑高下瞰新濠響林不遠也響林中有昇
 真觀觀有歸鶴堂徐神翁瘞劍之所徐名守信如

臯人崇寧中封虛靜冲和先生贈大中大夫按紀勝神翁墓在海陵縣東七里築碑立闕制如大中大夫在響林中○茅山在州東北六十里高二丈四尺周二百五十一步嘗產香茅長二丈有五尺阮勝之記云招遠東南六十里有茅山俗名避灾地山有景德寺富鄭公讀書其中范文正公生祠亦在焉監倉楊阜爲之繪像韓子蒼詩云藤林苑枕快清風破悶文章亦謾供鄉信未傳霜後鴈旅懷生怯曉來鐘淹留已辦三年計流落應無萬戶封猶有壁間詩句在他時誰爲寫塵容○寰宇記

云天目山在海陵縣東六十里土山也上有雙井如日相對故名畿志謂去州東四十五里王仙翁居之王名治晉時人至梁大同中丹成群仙引導白日飛昇昭明太子與邵陵王綸詣山致禮焉舊傳仙翁臨去之日藏靈室五符杖屨水鞋隱帽于左井封鑄甚密至宋元豐二年發運使蔣之奇致禮請禱開其石井得鹿角數十丈又獲金龍玉壁三十六口紀勝云天目山有集真觀宣和中更治殿基又得丹爐鼎器皆赭色可以服食丘容詩云三山王鹿女異迹落人間瑤草今何在晴光滿舊

山蓋王仙翁居山時見馴鹿產女于草莽因挈養
菴中鹿來乳之後十六年仙翁築臺居之號鹿女
臺及翁冲舉後女欲南走遂履江水而去謂人曰
百年後吾當復來至唐景雲中果復隱山中土人
計其歲月適當百年矣卽王妙行也○博物志云
海陵縣多麋千萬成群掘食草根其地成泥名茶
畷民人種稻不耕而穫百倍或云薊也沿海洲上
有之其實如大麥名自然穀亦名禹餘糧相傳本
州沿海洲上蘆葦無際群鹿常兩兩負其子而行
人不能獲後漢志作麋畷卽今長洲澤是○漢書

揚州有桃花米志云卽海紅俗呼泰州紅○胡逗
洲在海陵廢縣東南二百三十八里海中東西八
十里南北三十五里上多流人煮鹽爲紫梁太清
六年侯景敗走將北赴此洲爲王僧辯所獲○宋
朝類苑云西溪鹽倉卽海陵監也呂文靖公夷簡
嘗官于此手植牡丹一本于署中有詩云異香穠
艷壓群葩何事栽培近海涯開向東風應有恨憑
誰移入五侯家其後范文正公希文涖監和二云陽
和不擇地海角亦逢春憶得上林色相看如故人
後人因二公詩筆續和尤多而花亦極貴重護以

朱欄不忍拗折歲久幹尚數丈每春時花開少亦數百朶海濱爭誇以爲勝事○本朝饒使分司于秦州者則駐東臺場所屬中十場曰富安安豐梁塌東臺何塌丁溪草堰少海角斜拚茶○中洲山在州東北百二十里西溪鎮之北鹽倉之東范仲淹監西溪鹽倉時累土爲山東望滄流西望沃壤竹木森翳形勝萃焉○西溪鎮有孝子祠祀漢董永卽遇天女者古錄云東都天女寺尼性空大師塔銘唐元和六年給事郎于志言文按東都揚之總名天女寺則廣福院之始名也方輿勝覽謂西溪鎮有天女繅絲井在廣福院內相傳董永故居其井卽天女所常汲以繅絲者鹽記云丁溪場有永墓及其塋親處永海陵人○鎮西四里七十步東臺聖果院唐貞觀時建院有高麗鼓僞唐保大中隨潮飄至者范仲淹詩千年人已化三昧語空傳唐世碑猶在高麗鼓半穿王象之二云鎮東三里有三昧塔尚存名三昧塔○本院古井欄保大中琢舊有綆迹深入寸許後更合滿其銘亦隨之漫滅蓋活石云按集古錄李陽冰書縉雲三碑篆刻最細瘦亦由石活歲久漸長

刻處幾合故也○西溪一名晏溪因晏殊嘗官于此東通角斜河西入運河○按角斜河辭郎河忠義河佛兒溝皆去縣百二十餘里與西溪鎮相近佛兒溝在海中本唐時瑞輝寺今壅爲溝渡海者過其處屢獲銅像因名○忠義河在鎮北三里隋賀若弼捕海寇有功于人爲之立廟河側○包老湖在州東北四十里水至清而無滓湖面雖與他水會而不能雜挈壺氏嘗取以供滴漏又十里有雞雀湖昔多雞雀飛集因以爲名○顧野王輿地志云海陵有白土埭史宗之居也史宗卽蓬萊山

寄書者按海陵得蓬萊之名如壁間金闕倚天開五見宮花落晚槐明日扁舟滄海去却尋雲氣到蓬萊則劉攽自道山倅海陵作也如海邊無事日日醉夢魂不到蓬萊宮則東坡送貢父倅海陵詩也或皆本此○宋張次山守泰州見水鶴集于戒石之前長鳴若訴次山諭使先飛令一人隨之鶴止大樹上蓋近隣有烹其二雛者卽以其人至鶴亦飛來次山爲斷罰之乃飛去○續廟記云州三忠祠祀宋李庭芝姜才孫虎臣也庭芝應山人權知揚州日元氣正熾李虎張俊等各以招降至庭

芝焚榜梟俊五人于市阿木攻楊久城中雜牛皮
 麵蘖為食亦不忍叛時宋已亡謝太后諭降詔至
 射死使者曰吾惟一死耳既而益王以少保丞相
 來召乃將七千人同姜才赴之至泰州為追兵所
 及遂遇害○姜才濠州人以通州副都統從孫虎
 臣與虜戰于丁家洲三里溝楊子橋互有勝敗德
 祐二年正月宋亡阿木使招之才曰吾寧死不作
 降將軍也四月五月連攻灣頭柵殺虜帥董士元
 全師歸楊七月益王在福州來召才與庭芝東經
 泰州將浮海赴召會阿木圍泰才疽發不能戰諸

將開門降與庭芝俱死焉○吳陵書院祠王心齋
 先生先生安豐鹽場人其鄉煮海不事儒業家復
 窶甚幼從塾師粗受大學章句弱冠使之治商已
 又使受醫皆弗竟聞王陽明鎮豫章以道學為海
 內宗乃懷海濱生刺往謁踞上坐與語悅之願為
 弟子退而有疑復即上坐反覆論難數日竟悅服
 執弟子禮焉陽明語人吾持萬眾擒宸濠未嘗少
 怯今日為此生心動矣于是先生益自任乃製招
 搖車將周流天下初至京師人士聚觀如堵咸日
 懾之先生發論多出獨解與傳註少異簡易徑截

不爲枝蔓鄒守益湛若水輩咸重之卒年五十八
四方會葬者數百人先生初名銀陽明爲改名良
字汝止

如臯縣

在州東南
四十五里

東漢廣陵郡地晉安帝義熙七年分廣陵五縣立
山陽郡如臯之名始見隋時縣省入寧海唐太和
年析海陵五鄉置如臯鎮南唐復陞縣自後因之
○寰宇記云如臯港在縣西百五十步港側有如
臯村縣因其名○春秋傳云賈大夫之妻不笑御
以如臯射雉按志縣馬塘河岸水中有高臯名

臯卽古射雉處縣東南二里有賈大夫墓東二十
里有賈大夫廟在陳鎮舖左○方輿勝覽云治南
一里有芙蓉園四圍皆深渠中有方池土臺秋時
芙蓉盛開爲邑人遊賞之地○萬花園在治東三
里元淮南王所築今爲冑氏塋○畿志云隱玉齋
玉洵泉俱在中禪寺宋曾肇隨其父易尹如臯日
置齋寺東廂爲讀書處扁曰隱玉其中有泉水味
清冽玉色洵洵縣人王覲有覆欄常蒲梧陰冷煖
茗猶呈玉色寒之句○寰宇記云會盟原在縣東
十里春秋吳楚會于邗溝卽古升港舖也鄭晉叔

云攷終春秋之世吳楚不相會盟惟有吳城邗溝
通江淮見哀九年又哀十二年公會衛侯宋皇瑗
于鄖註疏鄖發陽也在廣陵海陵縣如臯屬廣陵
郡與海陵縣相接疑卽其地○車馬湖在范湖洲
東南古老相傳范蠡爲五湖之遊棄車馬于此岸
○志云度軍泉在治西十里許地名聖井欄泉雖
淺而不竭擊其欄則大溢出昔岳飛經畧通泰領
兵過此數千人飲之泉亦如故因名爲度軍井元
淮南王聞其異取欄置庭中○狀元坡在縣西北
十里宋狀元王俊乂讀書院地也俊乂王覲從子

初遊學京師資用屢乏時林靈素開講寶籙宮
駕將臨幸詔兩學選士子入直司成以俊乂及曹
偉應詔辭不獲及至講所去御幄陸步內侍傳呼
至再俊乂但望幄致敬不出次呼曹偉偉回顧俊
乂目之亦不出後以上舍選奏名列下徽宗親擢
第一及唱名見其容儀益喜曰此真所謂俊乂矣
實錄云宣和間士大夫稍知分別邪正李祈友王
俊乂之力也遷吏部右司員外人呼王右司○玉
蓮池在定慧院前王俊乂詩惟有玉蓮池內水滄
波深處老龍眠○連珠池在縣西北二十里東西

相接如連珠故名宋元祐間嚴希孟與遺逸游味于此有云小橋過南浦夾道桑榆綠水遶若連珠時添芰荷馥○土山在縣西南三十里有白馬將軍廟其處卽安定鄉宋胡翼之先生故里也有墓在焉祠在縣學西□先生名瑗海陵人少有氣節顯力經學景祐中以知古樂召試校書郎再辟丹州推官爲蘇湖二州教授驛召會秘閣議樂對崇政殿辨李照等所脩樂之訛詔令改作乃按周禮以正鐘律用上黨黍列爲九等纍其中者爲尺尺定而律成驗之比舊下一律于是撤前樂而新之用于郊廟又令作皇祐新樂圖記布之天下蓋積二十年而樂成改大理寺丞賜緋魚□東都事畧云翼布衣時與孫明復石守道同讀書泰山攻苦食淡終夜不寢一坐十年不歸慶曆四年建太學下詔湖州取胡瑗教授之法爲例○浦岸在縣北五十里東西亘五十里古老傳云是古之海岸土高埠產艾是孫真人遺種○平阜在江寧鄉東西延亘六十里土高阜相傳是古之江岸肥腴宜五穀○九十九灣卽龍游河也在東南六十里相傳龍過成河蜿延至此其水北接運河南通揚子江

○縣東南六十里有吳呂岱墓按傳岱海陵人仕吳爲交州刺史降高源鬱林桂陽諸賊封都鄉侯在任歷年不餉家妻子困乏吳主聞之讓群臣曰呂岱出身萬里爲國勤事家門內困而孤不早知其責安在于是加賜錢米布絹○縣南百二十里有摩訶山在楊子江中流去石莊二十里水勢甚湍激志謂卽蝦蟇山山多異蛇嘗有僧上山蛇與之分道而行因立泗州大聖殿于上今江坍山遠去岸逾五十里○鹽鐵志曰凡取滷煮鹽以雨晴爲度必亭地乾爽先牽牛扶刺刀取經宿鋪草藉

地復牽爬車聚所刺土于草上成溜大者高二丈方一丈以上鋤作滷井于溜側多以婦人少丁執蘆箕名之爲黃頭飲水灌澆蓋從其輕便食頃則滷流入井取石連十枚嘗有厚薄全浮者全收鹽半浮者半收鹽三運已下浮者則滷未堪瀆却刺開而別聚溜滷可用者始貯于滷槽載入竈屋別役人丁駕高車破皮爲窄連絡頭皮繩掛着牛犢鐵杓鈎搭于草場取采蘆柴芴草之屬旋以石灰封盤角散皂莢于盤內起火煮滷一溜之滷分三盤至五盤每盤成鹽三石至五石旣成人戶疾着

水展上盤昂熨炊取稍遲則不及收訖接續添滴
晝夜可成五盤乃住火而別戶繼之土流已澆者
攤開刺取如前法若不爬溜之地必鋤蒿草益人
牛從新耕犁然後刺取大約自刺土至成鹽不過
四五日但近海亭長及晴雨得所或風色人便刈
所收益多蓋久晴則地燥頗雨則滴薄亭戶不避
盛寒溽暑專其生業故也然而收滴成鹽故不恒
其所云○按鹽出于煎煉者謂之末鹽卽周官所
謂散鹽也若山西解州鹽池出者得南風水化而
成謂之顆鹽則周官所謂鹽鹽也○末鹽在淮安
則鹽成監通州則豐利監泰州則海陵監及如臯
倉少海場四郡惟泰出鹽最多通次之淮安與浙
江嘉興臨平兩監又次焉計每歲天下所收鹽利
當租賦二分之一

通州

在府東
四百里轄一縣

自唐以前地理與泰州同南唐李氏于海陵縣東
境置靜海都鎮制置院周世宗平淮南始陞鎮爲
靜海軍尋析泰州置通州其義一也其時通州轄
縣三日靜海曰海門曰崇明故宋有崇州之名詳
見下○五代史云楊吳使東州靜海都鎮遏使姚

彦洪脩城池官廨改東州爲豐樂鎮顧俊沙爲崇
明鎮布洲爲太安鎮狼山西爲狼山鎮及李主嗣
吳遣兵攻彦洪城陷彦洪聚族自焚以金寶投使
院中故老相傳使院中有金擣石至今風雨井中
有光燭天咸曰寶氣云○統志云州地斥鹵有井
皆鹹宋任伯雨謫居日儼城西民居濬智井而得
其泉民歌咏之○紀勝云總虛廨在州東先是州
貢院自風雲路入近壯武營嘉定中遷于州西紫
微舊宅久之廢其後士子附試南徐或海陵寶祐
中暫試于總虛廨咸淳四年改建治之蔬圃王應

鳳有碑記○國老談苑云時號通爲利市州者先
是數舉士人至辟雍者皆不利大觀中朱侍郎彦
爲守始移壯武營射堞不使壓州學上其年所解
三人至辟雍皆上舍選詔太守教官及考官皆轉
一官以其全榜皆過御筆添解十名○楊廷秀云
州南阻江北瀕海士大夫罕至居民以魚鹽自給
不爲盜賊訟稀事簡仕宦者號爲淮南道院以配
秦州○方輿勝覽云海山樓大觀中郡守朱彥建
凡三級扁曰海上遠眺在州治南陳瑩中青玉案
詞云碧空黯淡寒雲繞聽枕上風聲峭明透紗窓

初欲曉珠簾纔捲美人驚報一夜青山老使君留
客金樽倒正十里瓊瑤未輕掃歌歛梅花春正早
十分農事滿城和氣管取來年好陳傳古有詩門
下海濤奔鐵騎檻前山背擁金鼇茲樓之警句也
樓前卽綠漪亭○圖經曰南門樓望江處也紀勝
云崇寧四年郡卒有登城南樓見偉丈夫青巾白
袍轉倒于梁上頃刻白雲罩樓雲端見一鬼物面
青骨瘦與丈夫翻身騰雲而去俄有道人指言曰
此呂先生其面青骨瘦者先生所度老木精也已
道人亦不知所往後有于呂四場見之○志云通

之望江樓凡四在南門者不與焉一在望仙橋左
一在端平橋側一在鹽倉南一在戰壩東○晏公
類要云古橫江元是大海天祐中沙漲爲陸今有
小江東達大海○紀勝云州治內有山堂疊小山
爲五峯周公彥建鄭獬爲碑記五峯象狼山也○
狼山在州南十二里圖經謂在江淮之際有五山
相聯屬或云山形如狼或云有白狼居其上祝和
父云山下有拇窠上有鞭迹皆着石是秦始皇南
巡鞭石之迹六帖云始皇南巡至此作石橋過海
有神人爲驅山下石去不速者神輒鞭之○按志

揚州府志卷之二十七
狼山高五十三丈周三百四十六丈勝槩甲于江北宇宙之大觀也有廣教寺樓雲閣半山亭小浮圖觀音紫石二巖千人夕陽二洞古今題名詩刻甚多○澠水燕談云廣教寺唐爲慈航院在江中央昔人詩飛來靈鷲嶺化在寶陀山山前後乃江海相接處後江水南徙皆成陸田復有詩云昔平船底浪今日馬蹄痕皆紀實也○輿地志云樓雲閣在狼山寺前閣後卽望仙橋熙寧三年州人王觀記謂仙人呂洞賓卧于雲中騰空去州人翹望之閣名橋名皆以此○三會亭卽海桐菴也在狼

山寺宋初提刑薛球知州臧師顏別駕吳天常皆故人偶會于此因亭之有詩刻山上夏英公竦侍父監通州鹽場登狼山詩云渡口人稀黯翠烟登臨常怯夕陽天殘雲右倚維楊樹遠水南廻建業船山引亂猿啼古寺雷驅耳雨過閒田李鷹死後無歸客江上鱸魚不值錢按公作此詩方十七○寰宇記云靜海縣有狼軍塔刀办馬鞍五山○真誥云海中有狼五山註曰在海中對句章岸今已平陸矣○刀办山在狼山東高二十九丈周四百七十二丈相傳秦皇磨劔其上故名上有獺洞下

有淡竹灘○軍山在刀必東南隔江數里高三十五丈周九里十三步謂是秦皇駐軍處下有燕真人煉丹臺有桃花峪昔時萬樹今猶數株有白雲洞雲興則雨雲散則晴○按燕真人家于靜海因至海陵于登仙橋下遇仙遂浪迹江湖及歸所著衣鮮潔如新澣者市人問之曰我昨日在池州洗來人不之信後有客自池至記其時日正合○塔山亦名黃泥在狼山西高十七丈周二百九十丈有仙女洞相傳里老女子從龍舒來居之歲久仙去洞東望姑峯高可六七仞下有沉鴈灣通濟關

石上刻字晉元時海運故道孫昌齡詩白狼去後桑田出仙女昇時洞府閒○馬安山在塔山西高如之而週倍以形似也相傳隋煬帝征遼時放馬數十匹山中日久無恙乃封山爲馬安未詳○志云金沙河在城東二十里水通金沙場宋兩淮制置使李庭芝鑿○西亭河在東北二十里有巡司近場有賣魚灣宋文天祥過灣詩云風起千灣浪潮生萬頃沙春紅堆蠟子晚白結鹽花故國何時信扁舟到處家狼山青數點極目是天涯○寰宇記云利豐監在城南三里管八場曰金沙西亭石

港豐利和餘慶呂四○按今通州所轄鹽場其名曰豐利馬塘掘港石港西亭金沙餘西餘東餘中呂四爲上十場○鹽鐵志云楊吳太和中蔣司徒者吳郡人猝至布洲教民經營煮海大獲鹽利不賦而羨未幾籍其竈數而歸于朝沒後鹽民思而祀焉○宋初江淮制置請私販鹽二十斤者坐徒元絳令靜海命之曰海濱之民斤鹵不毛恃鹽以生自非群販者上坐笞罰○文文山集云金應吉水人也以筆札往來吾門二十年性烈而知義去年從予勤王授江南西路兵馬都監予之比

行也人情莫不觀望僚佐星散惟應上下相隨更歷險阻至通州住十日餘忽伏枕命醫三四熱病增劇而卒予哭之痛其歛也以隨身衣服塋之西門雪窖邊不欲求備者邊城無主恐貽身後之禍異時獲取其骨歸塋廬陵而後日可瞑也傷哉作二詩焚而吊之乞鄭雍言爲之銘○本朝正德九年州人曹某于城東黃泥口鑿池得古冢題石曰駱賓王之墓啟其木衣冠如新少頃卽滅乃封之取其銘以歸後亦棄去世傳賓王祝髮而復衣冠可異也

海門縣

在州東四十里

本海陵之東境後周顯德五年始析通州置縣三
靜海卽今州也崇明于本朝洪武九年割屬蘇州
矣海門卽當縣○按九域志縣治在州東二百十
五里今密邇州治者以元末水患北在禮安鄉本
朝正德中又徙餘中場嘉靖乙巳又徙金沙場其
實皆州境也故水利志謂海門新以州土割立其
地與州壤相錯焉○吳陵志云海陵之東有二洲
唐末割據吳姚存制居之爲東州鎮遏使制卒子
庭珪代爲東州靜海軍使始築城錢王鏐以水軍


攻破之虜廷珪而吳又使廷珪猶子彥洪居之仍
脩城池官廨號靜海都鎮其後彥洪率兵民萬人
奔吳越在周顯德三年○紀勝云古大安鎮卽東
州也又名布洲分爲東南二所東布洲元是海嶼
沙島曾有布機流樹其上後沙漲漸爲陸民戶亦
繁南布洲舊是森然大海沙漲成場卽金沙場也
宋時煮鹽其中本場鹽額十八萬石○圖經云太
平興國八年漁者嚴午至小港捕魚見三虎入江
化爲船望布洲去數日人云鹽場有三虎往來志
謂在城南四十里有布洲夾水勢如激箭○大海

北自鹽城界南經興化泰州如臯折而過通州海門至呂四場東南角觜始與江合今黃泥山有兩石門相對卽元朱清張宣海運故道由此以達直沽者也○澠水燕談熙寧四年高麗遣使脩貢將由四明登岸被風飄至新港先以狀致通州云望斗極以乘槎初離下國指仙源而迷路誤致仙鄉按宋時大海去縣八十里新港卽呂四場之新河也○祝和父曰海門有料角嘴其中有鹹淡二水不相混雜舟人不待汲能辨之其形勢號爲控扼紹興中以水師把隘其沙脉坍漲不常潮水則委

蛇曲折水路可認大則一槩漫沒非熟于往來舟人不能知向來李寶膠西之捷蓋由于此卽按繫年錄秦會之云通州入海當山料角汲東沙淡者也○長編云國初以來大辟獲貸者多配隸登州沙門島通州海門島皆有屯兵使者領護海門島有兩處崇明鎮以居豪強難制者東布洲以居懦弱者皆令煮海納官至興國五年始令配役者隸鹽亭役使而沙門島如故○志云沈起知縣日鹹潮爲患民多遷徙乃築隄延袤七十里引江水灌漑其中田爲之腴民相率來歸立祠以報至和間

王安石令是邑爲立碑○運鹽河自江都灣頭起經泰州如臯通州至海門凡四百餘里其支派通各鹽場故名鹽河其故迹則吳王濞所開者初濞開邗溝自揚州茱史灣通海陵倉及如臯螳谿而至當縣達呂四場三國以後故道湮塞宋熙寧中復通今呂四場有東洲河卽其故處亦淤淺矣○沿海六港進鮮港其一也海錯多聚于此○呂四場者相傳呂洞賓自南門樓現身之後凡四游茲場人皆見之故名揚州鶴產本場其脚有卦文畿志曰呂四場有白水蕩其地曠濶魚鳥鶴鹿之所

遊泳焉○海門三山皆築土而成者呂四場有東山宋淳熙中孫道人築又能以術運大木建廟山中戴青山僧姓名也募築此山後没于海今玉竈復築因舊名治東五里韓童山巫者所築以其名名之○魚骨橋在禮安鄉舊縣治在此每歲閏則海出大魚乘潮上潮落則涸于沙但所涸無方亦不常得也鄉人取其二鯁骨爲橋長丈有八尺餘至正中隨治圯入江萬曆戊戌隨沙漲起呂四場人獲之色黝黑有釘痕而不可蠹用以建橋于儒學前明年如臯江岸又獲大魚數千斤



卷之四